

# Marzuki Mahmood pengarah baru Insaniah

ALOR SETAR 21 Feb. — Kerajaan negeri melantik Prof. Madya Dr. Marzuki Mahmood sebagai pengarah Institut Agama Islam Negeri Kedah Darul Aman (Insaniah) yang baru, berkuat kuasa 19 November tahun lalu.

Pelantikan tersebut sebagai menggantikan Prof. Datuk Dr. Othman Ishak yang meletakkan jawatan untuk bertanding dalam pilihan raya umum ke-10 pada 29 November lalu.

Dr. Marzuki adalah anak tempatan dan memiliki Doktor Falsafah (Ph.D) dalam bidang Sejarah dan Tamadun Islam dari Universiti Al-Azhar, Mesir.

Beliau pernah berkhidmat di Universiti Kebangsaan Malaysia (UKM) selama 23 tahun sebelum berhijrah ke Insaniah pada tahun 1996 sebagai pensyarah dan Dekan Kuliyyah Bahasa Arab.

Dalam satu kenyataan hari ini, Insaniah juga turut mengumumkan pelantikan Prof. Madya Dr. Sayyid Muhammad Aqiel Al Mahdaly sebagai Timbalan Pengarah (Akademik) Insaniah berkuat kuasa 1 Januari lalu.

Beliau adalah lulusan Doktor Falsafah dalam bidang Falsafah Islam dari Universiti Ain Syam, Mesir dan menjadi pensyarah serta Dekan Kuliyyah Usuluddin di Insaniah sejak tahun 1996.

Insaniah adalah sebuah institusi pengajian tinggi Islam milik penuh kerajaan Kedah yang mengadakan program berkembar dengan Universiti Al-Azhar, Mesir dan institusi pengajian tinggi tempatan seperti Universiti Malaysia (UM), Universiti Utara Malaysia (UUM) di peringkat Ijazah Sarjana Muda dan peringkat lebih tinggi lagi.